

# Kom, Heilige Gees!

10 DAE 5- 15 Mei 2016

**Oproep tot die hele Liggaam van Christus om vir 10 dae voor God te staan vir herlewing in Suid-Afrika!**

## **5-15 Mei: 10 Dae van gebed vir Herlewing**

Ons roep weer eens die kerk op tot 10 dae van gebed voor Pinkstersondag (15 Mei). Mag hierdie 'n tydperk van intense gebed wees vir 'n vars uitstorting van die Heilige Gees op die kerk en elke gemeente.

### **DAG 1 :10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*Toe dit met hom (Manassa) so sleg gaan, het hy die Here sy God om genade gesmeek, groot berou getoon voor die God van sy voorvaders ... (2 Kronieke 33:12). O Here ons God, ons is bekommerd oor die omstandighede in ons land. Ons besef dat ons 'n persoonlike keuse sal moet maak om ons eiesinnigheid te laat staan en ons trots en eiegeregtigheid voor U te bely. Ons erken dat ons nie daarvan hou om verkeerd bewys te word nie. Ons loop oor ander wat in ons pad staan om sodoende te probeer om beheer en seggenskap te behou. Vergewe ons asseblief en wees ons genadig.*

**Stof tot nadenke:** 'n Ooggetuie het agterna verduidelik: "Die ontsagwekkende teenwoordigheid van God het oortuiging van sonde soos 'n golf laat breek, waaronder selfs die mees volwasse Christene van hulle sondigheid bewus geword het. Dit het die onbekeerdes laat sug van benoudheid en gebede van bekering begin bid. Sterk manne is neergebuig onder die las van sonde. Smeking vir genade is saam met die uitroep van vreugde van diegene wat die nuwe lewe ontdek het gehoor. (Die Hebridiese Ontwaking, 1949).

**Onophoudelike gebed:** *O God, is my hart rein? Is my hande skoon?*

### **DAG 2: 10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*... doen dan dit, my seun en red jouself so, as jy in 'n ander se mag beland het: gaan soebat hom, gaan pleit by hom! (Spreek 6:3).*

God vol ontferming, ons bely dat ons almal op die een of ander manier teen ons medemenses gesondig het. Ons sondig teen mense van ons eie etniese groep en teen ander etniese groepe deur die eise van U Woord te verontagsaam. Vergewe ons asseblief! Help ons om mekaar te vergewe vir dinge wat in die verlede verkeerd geloop het. Lei ons ook om dinge weer reg te stel sover dit vir ons moontlik is.

**Stof tot nadenke:** Herlewing begin nie met vreugde en met 'n wonderlike tyd vir almal nie. Dit begin met gebroke en verslae harte. – Petrus Octavianus.

**Onophoudelike gebed:** *O Here, U vereis 'n gebroke en verslae hart. Hier is my hart, breek my ...*

### **DAG 3 :10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*Die priesters wat in die diens van die Here staan, moet tussen die voorportaal en die altaar gaan staan en huil, hulle moet sê: "Betoon medelye met U volk, moenie die volk wat aan U behoort tot 'n bespotting maak sodat die nasies met hulle sal spot nie. Waarom moet daar onder die volke gevra word: 'Waar is Israel se God?'" (Joël 2:17).*

Verterende Vuur, ons bely dat ons nie voor U huil vir die mense van ons land nie. Dit is waar wat die nasies van ons sê: "Waar is hulle God?" Ons roep daagliks na U en meestal net vir ons persoonlike oorlewing en behoeftes. Vergewe ons asseblief, versag ons harte en spaar U volk, o Here! Laat ons erfenis, ons volk, nie meer 'n voorwerp van veragting en 'n bespotting onder die nasies wees nie.

**Stof tot nadenke:** Daar is nie so iets soos 'n herlewing sonder trane van oortuiging en berou nie. Herlewing gaan oor persoonlike heiligheid. (Revival, a people saturated with God deur Brian H. Edwards).

**Onophoudelike gebed:** *O God, gee vir my trane van opregte berou.*

#### **DAG 4 :10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*Maar die tollenaar het ... gesê: "O God, wees my, sondaar, genadig." Ek sê vir julle: Hierdie man en nie die ander een nie, het huis toe gegaan as iemand wie se saak met God reg is. Elkeen wat hoogmoedig is, sal verneder word; en hy wat nederig is sal verhoog word. (Lukas 18:13-14).*

Regverdige en soewereine God, ons bely as gelowiges dat ons soos die eiegeregtige Fariseër is wat dink ons hoef nie meer ons sonde te bely nie. Ons glo so dikwels dat ons geestelik te ver gevorder is om belydenis van sonde te doen. Ons vra om vergifnis en bid dat U lig op ons sonde sal skyn. Ons wil onself nie verhoog nie, maar in alles leer om onself te verneder, ons van sonde te bekeer en heilige lewens te lei.

**Stof tot nadenke:** Herlewing is wanneer God sy teenwoordigheid openbaar as 'n oorweldigende werklikheid. Dit laat mens met 'n diep bewuswording van God se grootheid en voortrefflikheid en van jou eie onwaardigheid en afhanklikheid van Hom. (Revival Fire deur Wesley Deuwel).

**Onophoudelike gebed:** *Here Jesus, U alleen is waardig! Ek is net 'n sondaar ...*

#### **DAG 5: 10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*En julle wat jonger is, moet aan die ouer mense onderdanig wees. Almal moet teenoor mekaar nederig wees en mekaar help, want God weerstaan die hoogmoediges, maar aan die nederiges gee Hy genade. (1 Petrus 5:5-6).*

Regverdige Meester, ons bely dat ons dikwels nie luister nie en ons nie volgens U plan onderwerp aan die raad van ouer en wyser mense wat U rondom ons plaas nie. Ons staan skuldig omdat ons onself as reg wil bewys én dat ons meer geestelik is as almal rondom ons. Ons gebruik selfs U Naam om ons eie planne en idees te regverdig. O Vader, wees ons genadig en vergewe ons. Ons buig en verootmoedig onself onder U kragtige Hand.

**Stof tot nadenke:** Nie net het die aantal gebedsbyeenkomste vermeerder en het meer mense dit bygewoon nie. Daar was nie net 'n groter erns in die vergaderings nie. Daar was ook 'n kragtige gees van gebed in die binnekamer. Baie Christene het ure spandeer in privaat gebed. – Charles Finney.

**Onophoudelike gebed:** *O God, wees my genadig. Moet my nie weerstaan nie ...*

#### **DAG 6: 10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*"Ek het iemand tussen hulle gesoek wat 'n muur sou bou en vir die stad in die bres sou tree dat dit nie vernietig word nie, maar Ek het niemand gekry nie. Daarom laat Ek my toorn oor hulle losbreek en vernietig Ek hulle met die vuur van my gramskap. Ek laat hulle kry wat hulle verdien," sê die Here my God. (Esegiël 22:30-31).*

Soewereine God, ons bely dat daar min toegewyde bidders in ons land is om in gebed voor U te staan. Wanneer ons vir ander intree, staan ons dikwels hoogmoedig teenoor die verlore en selfs medegelowiges deur die manier waarop ons bid. Wees ons asseblief genadig en vergewe ons. Laat ons opnuut in die bres staan vir ons land en mense. Leer ons hoe om reg te bid en wat die dieper betekenis van interessie is.

**Stof tot nadenke:** My geheime gebed – Ek bid dat ek baie gering sal wees in my eie oë en nie enige deel van my geliefde Meester se heerlikheid sal steel nie. – George Whitefield.

**Onophoudelike gebed:** *Here Jesus, help my om onder U genadige hand te buig.*

#### **DAG 7: 10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*Jy moet onthou hoe die Here jou God jou nou veertig jaar lank in die woestyn gelei het. Hy het dit gedoen om jou nederig te laat word en om jou op die proef te stel sodat Hy kan weet wat jy dink en of jy sy geboorte sal gehoorsaam of nie. Hy het jou laat swaarkry, laat honger ly ... om jou te leer dat 'n mens nie net van brood leef nie, maar dat hy leef van elke woord wat uit die mond van God kom. (Deuteronomium 8:2-3).*

Goë Meester, ons bely dat ons dikwels teen U in opstand kom tydens moeilike tye in ons lewens en land. Ons vergeet dat U ons in alles toets om ons harte te reinig. U is soewerein. Vergewe ons ons murmuring en dat ons U in ons desperaatheid verag en verlaat. Ons verootmoedig ons vrywillig voor U en onderwerp ons aan U plan met ons en ons land.

**Stof tot nadenke:** As God se kinders vandag gretig is vir herlewing, sal hulle hulself onder sy magtige hand verneder sodat Hy hulle op die regte tyd kan verhoog. (Baptize with Fire deur Arthur Skevington Wood).

**Onophoudelike gebed:** *My God, wys my wat in my hart is.*

#### **DAG 8: 10 Dae van Gebed vir Herlewing**

**Voorwaardes vir herlewing: ...en My volk...toon berou en bid...**

**(2 Kronieke 7:14)**

*Die leiers van Israel en die koning het hulle verootmoedig en het gesê: "Die Here doen reg." Toe die Here hulle berou sien, kom sy woord weer tot Semaja en sê: "Hulle is vol berou. Ek sal hulle nie uitroei nie. Ek sal hulle gou ... laat vrykom." (2 Kronieke 12:6-7).*

Koning van die konings, ons bely dat nie alle leiers in ons land hulself voor U verootmoedig nie. Ons tree namens hulle in as ons bid. Ons verootmoedig ons voor U, want U is 'n regverdige God. Ons kies om weg te draai van ons ongeregtheid. Ons pleit ernstig by U dat U ons nie sal vernietig nie, maar gou aan almal in ons land bevryding en verlossing sal gee.

**Stof tot nadenke:** Weer en weer het kragtige herlewings slegs gekom wanneer God se kinders besef het hoe oneindig heilig God in sy wonderlike wese is en hoe afskuwelik sonde voor sy aangesig is. Wanneer mense hulself voor God verootmoedig, hulle sonde bely en hulle bekeer, sal golwe van herlewing oor 'n kerk of area breek. (Revival Fire deur Wesley Deuwel).

**Onophoudelike gebed:** *Heilig, heilig, heilig is U, Here God Almagtig!*

#### **DAG 9 : 10 Dae van Gebed vir Herlewing**

**Voorwaardes vir herlewing: ...en My volk...toon berou en bid... (2 Kronieke 7:14)**

*Daarom moet julle al die sedelike vuilheid en ongeregtheid opruim wat so welig tier en ootmoedig die woord aanneem wat God in julle geplant het, want die woord kan julle red. Julle moet doen wat die woord sê en dit nie net aanhoor nie, anders bedrieg julle julleself. (Jakobus 1:21-22).*

Rein en heilige vlekkelose Lam van God, ons bely die onsedelikheid en kwaad wat ons in ons land toelaat sonder om 'n woord daaroor te sê. Ons is deel daarvan, want ook ons kyk na eksplisiete televisieprogramme, ons lees ook soms onsedelike leesstof en baie van ons keur euwels soos abortsie, egskeiding, homoseksuele en lesbiese verhoudings goed. Help ons asseblief om nou op die waarskuwing van die Heilige Gees in ons harte ag te slaan en gehoorsaam te doen wat U sê. Trek ons nader aan U en weg van die wêreld.

Stof tot nadenke: Herlewing is nie 'n tyd van godsdienstige vermaaklikheid met skares wat byeenkom vir 'n aand van gesellige geestelike musiek en sang nie. Herlewing is wanneer God kragtig in ons byeenkomste teenwoordig is en almal weet dat God die gemeenskap in sy greep het. In 'n Godgegewe herlewing spandeer niemand geld op advertensies nie. Tydens herlewing word elke diens 'n plek waar mense hulle harte ondersoek; die paaie en heuwels word heilige plekke wanneer die winde van God waai. – Duncan Campbell.

**Onophoudelike gebed:** *Here God, mislei ek myself deur slegs na U Woord te luister, maar dit nie te doen nie?*

#### **DAG 10 : 10 Dae van Gebed vir Herlewing**

**Voorwaardes vir herlewing: ...en My volk...toon berou en bid... (2 Kronieke 7:14)**

*Is dit al wat Ek op 'n vasdag wil hê: net dat 'n mens homself verneder, dat hy sy nek buig soos 'n biesie en in sak en as sit? .. Is die vas wat Ek wil hê, nie dit nie: om dié wat onregverdig gevange gehou word, te bevry, om die juk wat op mense druk, af te haal, om verdruktes vry te maak, om elke juk te breek? (Jesaja 58:5-6).*

Here, ons Skild en ons Krag, ons bely dat ons idee van verootmoediging dikwels rondom onself en ons persoonlike behoeftes en begeertes draai. Wees ons asseblief genadig. Leer ons die pad van nederigheid. Leer ons hoe om deur U Gees uit die kettings van ongeregtheid los te breek, die jukke wat ons gevange hou af te gooi en bevryding van ons gevangenskap te kry.

**Stof tot nadenke:** Die probleem in ons land is nie die regering, die onderwysstelsel of die ekonomiese toestande nie. Dit is ook nie daardie leweloze wettiese godsdienste wat alles of niks glo nie. Die ware probleem lê by die kerke wat beweer dat hulle die waarheid het en dink dat hulle ryk is aan geestelike gawes en lewe, maar eintlik is hulle koud, selfvoldaan en onaantreklik in die oë van die wêreld. (Baptize with Fire deur Arthur Skevington Wood).

**Onophoudelike gebed:** *O God, steek my hart weer eens aan die brand vir U!*

Daar is bykans geen kerkleier wat nie sal erken dat die kerk in die breë geestelik nie op 'n goeie plek is nie en dat ons 'n ingryping van God nodig het in die kerk. In Handeling 1 lees ons hoe die gelowiges vir 10 dae eendragtig saamgebied het. Op die 10de dag het God sy Gees op die kerk uitgestort. Daarna lees ons hoe God dit weer en weer gedoen het. (Handeling 4:31; 8:15-16; 10:44; 11:15). Oor die afgelope 2000 jaar is daar

duisende gevalle opgeteken waar soortgelyke belewenisse plaasgevind het. Sulke uitstortings van die Heilige Gees het sonder uitsondering gekom in antwoord op gebed.

Daarom wil ons die kerk opnuut oproep om die 10 dae voor Pinkstersondag 2015, 14-24 Mei, opsy te sit vir 'n definitiewe tyd van gebed vir geestelike herlewing in elke plaaslike gemeente in die land. As tema kan gebruik word: "Kom Heilige Gees!" Gemeentes wat dit onder ander temas wil doen is vry om dit te doen. Gemeentes word aangemoedig om bv. **daaglikse gebedsgeleenthede** te skep waar daar eendragtig saamgebid kan word. Oorweeg veral om 'n **gebedsketting of gebedswag** op te rig waar daar (*sover moontlik*) vir al 240 ure gedurende die 10 dae gebed kan word. **Betrek individue, Bybelstudiegroepe, vrouegroepe, mannegroepe, gebedsgroepe, jeuggroepe, ens.** Vra individue en groepe om gebedsgleuwe van een of twee ure te neem.

**"Twee belangrikste dinge wat die Kerk van Christus die meeste nodig het, is die krag van die Heilige Gees en meer gebed."** (Andrew Murray)

**Inisiatief van Jerigo Mure Internasionale Gebedsnetwerk**